

TEIR DA GRUPPAS: final svizzer a Turitg

## A tgatscha anstagl agl final svizzer



An pe da sagettar sen schebas on chels omens d'Alvagni e Surava tratg sonda passada sen tschervs e capriols.

**G.N.S. Er schi è danovamaintg betg reuschia a Tumegl da gudagnar igl final aint igl camp D, turnada a tgesa è la gruppja scu gio avant en onn cun la medaglia d'argent. Igl potenzial da far a Turitg ena medaglia vess er già la gruppja Alvra, dantant èn igls «Ardüers» sa decidias per la tgatscha anpe digl final.**

Igl final svizzer da gruppjas è aint igl calender da teir sainza dubi la pi impurtanta occurrenza. Dalla parteida èn stadas sonda passada agl teir a Turitg 70 gruppjas, tgi on cumbattia an treis categorias per daventar campiunessas svizras. Detg oter è chegl ple u manc l'elita svizra tgi è sa radunada agl «Albisgütli».

### Sur e Tinizong

Igl teir da gruppjas dattigl gio siva digl 1950 ed anfignen avant 20 onns ò igl final naziunal già

li ad Olten. Siva da lò ò chel li agl «Albisgütli» a Turitg e chegl adegna l'amprema sonda da settember. An chels 67 onns digl teir da gruppjas on igls davos 20 onns varsaquantas gruppjas grischunas gudagnea igl final. Chegl èn per exaimpel Castrisch, Sent, Schiers e Zuoz. Las unicas gruppjas surmiranas tgi on contanschia igl final naziunal èn stadas Sur, igl 1974 e Tinizong igl 1974 ed igl 1977, tottas dus gruppjas aint igl camp B.

### Siva da 40 onns puspe

Ossa siva da 40 onns veva cun la gruppja Alvra danovamaintg sa qualifitgeida ena gruppja da nossa regiun pigl grond event a Turitg. Igls quatter frars David, Gino, Sepp e Toni Ardüser e Maurus Engler on tratg treis fermas prerundas svizras e fatg uscheia igl zap aint igl final digl camp D, cun 39 otras gruppjas da radond 700 gruppjas. Gio la qualificaziun pigl final è stada en veir success per la gruppja Alvra. Cun pero esser igls tschintg commembers da chella

gruppja catscheders passiuonos, èn els sa decidias da betg eir a Turitg, mabagn dad eir sonda passada a tgatscha cun esser igl amprem de dalla tgatscha 2017. A Turitg ins ò già paca tgapientscha persiva dalla vart digls organisateurs digl final. Tar la rangaziun ògl alloura er do l'egn u l'oter tschivel per la gruppja Alvra, tgi vess già igl potenzial da far en bung resultat aint igl final.

### Gronda solidaritad per «Bregaglia»

Tgapientscha on igls organisateurs pero già per la gruppja «Bregaglia», tgi ò renunztgia agl final naziunal siva dallas boas a Bondo. Per la gruppja «Bregaglia» ògl alloura do grond applaus alla fegn digl final, tiers tgi ella era betg preschainta. A Turitg è la solidaritad stada fitg gronda ed exemplarica per igls Bregagliots e chegl da tottas varts. «Nossa medaglia d'argent deditgainsa nous agls noss ameis da teir dalla Bergiaglia», on detg chels da Tumegl, tgi èn nias vicecampiuns svizzers aint igl camp D, scu gio avant en onn, er schi vessan ple tgi mirito igl tetel da campiuns svizzers.

### Rangaziun

Camp A: 1. Hõri ZH, 967 puncts, 2. Gonten AI, 964, 3. Ibach-Schönenbuch SZ, 960, 14. Haldenstein, 948.

Camp D: 1. Dallenwil NW, 711 puncts, 2. Tumegl I, 707, 3. Eggersriet-Grub SG, 704, 4. Boningen, SO, 701, 5. Ennenda NW, 700, 6. Sattel SZ, 698, 7. Wiedlisbach, BE, 694, 8. Tumegl II, 684, 34 Scharans, 670.

Camp E: 1. St. Stephan BE, 689 puncts, 2. Pfeffingen BL, 680, 3. Dombresson-Viliers NE, 679, 14. Haldenstein, 948.

Rangaziun cumpletta: [www.swissshooting.ch](http://www.swissshooting.ch).



La gruppja da Scharans cun en Surmiran, Marco Collet (terz da san.) ...



... e la gruppja da «Bregaglia» cun en Surmiran, Rafael Spinaz (terz da san.).